

Il nov parlament in pass envers la dretga

La pcd fa la punt

DA LUCAS DEPLAZES / ANR

■ **En il nov parlament federal ha quai dà diversas midadas. Ils verds ed ils verd-liberals han pers. La pps e la pld han en l'avegnir dapli forza. La pcd ha mantegnì sia posiziun.** In nov parlament stat davant grondas sfidas. El sto segirar las ovras socialas sco l'AVS, las cassas da pensiun – cun in chapital da respargn da 700 fin 800 milliardas francs – en ina fasa ch'il chapital porta be tschains minimalissem. In ulteriur sector sensibel èn las relaziuns cun l'Uniu europeica cun ils problems da la libra circulaziun da persunas ed il sector d'asil. L'economia che vegn ad esser confrontada cun diversas difficultads (ferm franc svizzer, flaivla conjuntura) pretenda schliaziuns pragmaticas per garantir vinavnt in martgà liberalisà. Per ina sfida spinusa ha procurà l'actuala situaziun da smanatscha tras acts da terror che pretendan mesiras pli rigurusas da segirezza, senza dentant restrenscher ils dretgs da la libertad individuala.



En l'assemblea federala – cun 246 commembers – che elegia il cussegl federal han la pps, la pld ensemen cun quatter ulteriurs simpatisants 120 commembers, quatter vuschs mancan per ina maioritad. Ellas dovran pia sustegn dal center.

KEYSTONE

Il cussegl dals chantuns

Il cussegl dals chantuns u la chombra pitschna represchenta la forza federalistica dals 26 stans en il parlament federal. Il cussegl dals chantuns procura per in saun equiliber tranter ils chantuns gronds ed ils pitschens. El ha la medema paisa politica sco il cussegl naziunal. Senza ses consentiment datti naginas lechas u midadas da quellas.

Tar las ultimas elecziuns n'èsi betg reussi a la pps da rinforzar sia posiziun. Cun tschintg sezs resta ella sin il medem stgalim sco 2011. In success po nudar la pss che ha ussa 12 represchents. Dapli muntada ha en l'avegnir la pld che è cun 13 mandats uschè ferma sco la pcd. Lezza pro procurar per ina maioritad burgaisa u per ina maioritad da la sanestra e dal center.

Il cussegl naziunal

Ils 200 commembers dal cussegl naziunal – u la chombra dal pievel –

vegnan elegids tenor il sistem da proporz. Quai dat a las partidas pitschnas er ina schanza da conceder a Berna. En il cussegl naziunal hai dà ina posiziun burgaisa pli ferma grazia als success da la pps e da la pld cun in plus da 14 mandats. Pers ha il center, numnadamain ils verd-liberals e la pbd cun set sezs damain che l'onn 2011. La pcd ha pudì defender sia posiziun. Las duas partidas burgaisas pps e pld – ensemen cun trais palamentaris che sustegnan quellas – han ina maioritad da piz a cup, numnadamein 101 vuschs. La pcd vegn ad avair vinavant la funcziun da punt che vegn er en l'avegnir a procurar per ina maioritad, saja quai en dumondas economicas per ina maioritad burgaisa ed en dumondas socialas en favur da la sanestra.

Resultats da las elecziuns 2015 (2011)

Partida	mandats	Cussegl naziunal 2015 (2011)	cussegl dals chantuns 2015 (2011)	Parl.
Partida populara svizra (pps)		65 (54)	5 (7)	70
Partida socialdemocratica (pss)		43 (46)	12 (11)	55
Partida liberaldemocratica (pld)		33 (30)	13 (11)	46
Partida cristiandemocratica (pcd)		28* (28)	13 (12)	41
Partida verda (verds)		11 (15)	1 (2)	12
Partida verd-liberala (pvl)		7 (12)	- (2)	7
Partida burgais-democratica (pbd)		7 (9)	1 (1)	8
Partida evangelica (pev)		2 (2)	0 (0)	2
Legai dei Ticinesi		2 (2)	0 (0)	2
Mcr		1 (1)	0 (0)	1
Partida da la lavur		1 (0)	(0)	1
Senza partida		0 (0)	1 (1)	1
Total		200	46	246